

«Id es important da discuorrer insembel»

NICOLO BASS

Posta Ladina: Sascha Ullmann, el es gnü elet avant ün on sco president da la Gruppa d’interess da las possessuras e dals possessurs da seguondas abitaziuns. Culla procedura da cooperaziun dal cumün da Scuol e culla polemica tanter prüms e seguonds abitants intuorn ün proget da fabrica a Ftan, ha El ün on fich intensiv davo sai. Co es stat seis prüm on sco president da la IG ZWET?

Sascha Ullmann: Eu n’ha gnü üna partenza fich stipa. La procedura da cooperaziun es statta üna lezcha enorma e nus vain investi bler’energia. Eu n’ha eir gnü d’imprender a cugnuscher il prüm a blera glied, n’ha gnü da far uorden cun noms e fatschas e quai ha eir dovrà seis temp. Eu n’ha surtut fich gugent quist’incumbenza, schabain cha quist’incumbenza es statta vasta ed extaisa.

Ilia procedura da cooperaziun a regard la revisiun da la planisaziun locala dal cumün da Scuol han tschertas organisaziuns innatschà cun recuors, scha tscherts artichels da la ledscha nu vegnan adattats. Che rolla surpiglia la IG ZWET? La rolla da l’opposiziun o da la collavuraziun i’l sen da la procedura da cooperaziun?

La IG ZWET nun es gnüda fundada per far opposiziun, dimpersè sün giavüsch dal cumün sco partenari da contact pels possessurs e pellas possessuras da seguondas abitaziuns. Eu less cuntinuar cun quist’idea. Nus lain esser ün partner constructiv e nus nu tscherchain be la dispitta. Quai nu voul però dir cha nus nu daschain esser citics. Important es cha nus chattain insembel la via per sviluppar inavant il cumün. Nus eschan seguond dmurants e quai voul finalmaing eir dir, cha quist cumün es nos seguond dachasa. Nus vain grond interess chi va bain al cumün. Perquai nu lain nus far dispitta, ma nus rapreschantain noss interess.

Apropos far dispitta: Co es seis maniamaint persunal sco president da la IG ZWET e sco president da cumün da Zollikon a regard la polemica intuorn il recuors da fabrica a Ftan?

Ils prüms artichels in gazetta d’eiran tendenzius e polemics: «Unterländer gegen Einheimische». Nus vain guardà plü precis e vain constatà cha quai nun es uschè. Eir tschertas medias han lura guardà il cas plü differenzià. Bainschi sun tschertas dumondas amo avertas e quellas stuvaran gnir scleridas obain dal cumün, obain dal güdisch correspondent. Eir in mia lavur sco president cumünal da Zollikon vaina differents recuors pendants e nus stuvain adüna darcheu ans dumondar, scha quels vessan pudü gnir evitats, scha nus vessan fat nossas lezchas ouravant. Ils recuors sun suvent l’ultima guotta per surgnir udientscha.

El ha dit d’ürant la radunanza da la IG ZWET cha recuors (Einsprachen) sun la tschinchavla lingua naziunala in Svizra. Co vezza El – eir sco president cumünal – la cultura da recuors in Svizra? Ha El eir gnü cas, ingio chi’d es gnü fat recuors be per avoir avantags finanziaals?

Na, da quists cas nu n’haja amo gnü. Eu pens, cha quai sajan eir be cas extremis. Normalmaing vegnan fats recuors da persunas chi crajan vi da nos sistem da dret. Suvent han els il desideri da discuorrer ed il recuors es l’ultima pussibilità per surgnir l’udida. Nus vain actualmaing eir ün cas intuorn il bogn da Zollikon, ingio cha nu vain tadlà ouravant bain avuonda. Cul recuors vaina uossa stuvü sezzer vi d’üna maisa e discuorrer. Uschè vaina finalmaing eir chattà üna buna soluziun per tuot las varts.

Lura es quai la quintessenza: Discuorrer insembel e chattar soluziuns cumünaiplas?

La via da dret piglia pro dapertuot, quai es ün fat. A Scuol sun 60 pertschient possessuras e possessurs da seguondas abitaziuns, quai es eir ün fat. Scha la mità dals recuors vegnan fats da seguond dimurants, schi tuorna eir la relaziun. Quai es egualità da dret. Perquai esa fich important da tscherchar ouravant il discuors e da chattar la fiduzcha tanter ils vaschins.

Sascha Ullmann es daspö ün on president da la IG ZWET e president da cumün da Zollikon (ZH).